
TE HEHEURAA API

I neia i te piha neneiraa no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa. Te hoo e piti farani i te matahiti hoê.

Nu. 7

Tiurai. 1919

Mat. 13

Ua parau atura Iesu ia'na, na ô atura, E ao to oe, e Simona Bara-iona, e ere ta te taata i faaite mai ia oe i te reira, na tau Metua râ i te ao ra. E parau atoa'tu Vau ia oe, O Petero oe, e ei nia iho i teie nei papa e patu ai au i tau Ekalesia, e e ore roa ia e noaa i te uputa o hade Mat. 16:17-18.

TE TUPURAA A TE MAU TOHU I TOHU-E-HIA NA.

E imi râ tatou i roto i te bibilia ia ite tatou e, te ora nei anei tatou i te tau no te tupuraa o te mau tohu i tahu-ê-hia na, e aore râ, fei te atea ê anei te tau no te tupuraa o te mau tohu i tohu-ê-hia na.

Ua faaitehia mai e, ua fâ mai te Atua ia Adamu, Isaaka, Iakoba, Isaia, Ieremia, Samuela e ia Paulo i te anotau tahito ra etc. Te na ô maira te Atua; "O Iehova hoi Au, aore Au e huru ê," no reira e homa, te mana'o nei anei ontou e, aore e tia ia tatou ia mana'o e, e heheu atoa mai te Atua ia'na iho i teie mau anotau apî nei? E nafea e tupu mai ai te mau tohuraa a te mau peropeta ra, maori râ e e heheu mai te Atua ia'na iho i teie mau tau apî nei,

no te mea, te faaite mai nei o Amosa e; "Aita a te Atua e peu e rave, maore râ e na mua Oia i te faaite taua mau peu ra i ta'na ra mau tavini, i te mau peropheta. Ua taio tatou atoa i roto i te pene hopea no te Apokalupo i te parau i parathia e Ioane i te na ôraa mai oia e; "Ia iriti noa'tu te hoê taata i te hoê parau i te mau parau tohu i roto i teie nei buka, na te Atua e iriti ê atu i ta'na tufaa i roto i te buka ora, e i roto i te oire mo'a ra, e i tei papaihia i roto i teie nei buka." Apokalupo 22:19.

Ia feruri tatou i taua parau a Ioane ra e tia'i to tatou ma na'o. A haamana'o na tatou e, te parau i faaitelia mai e Ioane i roto i taua pene hopea ra, o te faaaraararaa ana'e ia i te mau taata atoa e, eiaha tatou e iriti ê atu i te hoê parau no roto mai i te Apokalupo, no te mea e, aore te bibilia i vai tumu i te tau a papaihia'i te Apokalupo e Ioane ra. Na mua a'e te papairaahia te Apokalupo e na muri a'e te papairaa o Ioane i ta'na ra episetole. Area râ no te poiri matapo roa o te taata i te haaputuputuraa i te mau papairaa mo'a ra, ei pipilia, tuuhia ihora te Apokalupo ei puka hopea i roto i te bibilia. Ua tuuhia te Apokalupo a Ioane ra ei buka hopea ia riro ei ravea faahaparaa na ratou i te mau heheuraa e tupu i muri a'e. No reira e homa, mai te mea e e riro taua parau a te Apokalupo ra ei faahaparaa i te mau heheuraa i horoahia mai i muri a'i i te papai-raa-hia'tu te Apokalupo, e ere anei ia i te mea tia ia parau atu e, e mea faufaa ore te episetole a Ioane, o tei papaihia i muri a'e i te papairaahia te Apokalupo. Eiaha râ tatou e parau e e mea faufaa ore te episetole a Ioane ra. E maite mea e, e mea faufaa taua episetole a Ioane ra, e tia atoa hoi ia matou ia faaite atue, e mea faufaa roa'toa te mau heheuraa i fariihia e Iosepha Semita i muri a'e i te fariiraahia te Apokalupo. E mea papu ia tatou atoa e, aore a te Atua e opua e faatupu maore râ na mua Oia

i te faaiteraa i taua mau mea ra i ta'na ra peropheta. No reira e ore te Mesia e tae faahou mai, maori râ e ia oti te faaiteraa a te Atua o te mau mea atoa i moe ra.

Eaha iā te tumu i ore ai te Atua i heheu faahou mai ai ia'na iho i te taata nei, mai te tau tahito e tae noa mai i te matahiti 1820? A taio na tatou i te parau a Isaia, pene 59 irava 1, 2 na'na i faaita papu mai i te tumu mau; Te na ô maira oia: "Inaha, aore te rima o Iehova i poto, e ore e tia'i ia'na ia faaora; aore hoi to'na tari'a turi, e ore e tia'i ia faaroo. Na ta outou ra mau hara i faataa ia outou e to outou Atua; e na ta outou parau ino i huna'i oia i to'na mata ia outou, i ore ai oia i faaroo mai ai." Na te hara o te taata nei i opanihia mai ai te mau ra i ia'na, e na ta'na ra mau hara hoi i faatiabha'i te hoê area ia taa ê maite oia i te Atua ra, are'a ra, mai tei parauhia'tu nei, eita te Atua e rave i te hoê mea hon a'e oia e faaita mai ai i taua mea ra i to'na ra mau tavini, i te mau peropheta. No reira e homa, eaha ra iā te tumo i ore e tia'i i te Atua ia faaita mai i taua mau peu ra i teie mau mahana apî nei?

Te haamana'o nei anei outou i te vahine Samaria o tei haere i te apoo pape e huti i te pape. Te no ô maira taua vahine ra ia Iesu. "Ua ite au e, te haere mai na te Mesia." Te ite ra te vahine Samaria e, te haere mai na te Mesia, aita râ oia i mana'o e, e haere mai o Iesu i te tau a ora'i oia (te vahine), e mea papu râ ia'na e, e haere mai te Mesia, aore oia i feaa i te reira, no te mea e, ua tohu-ê hia na e, e tae mai Iesu, area râ i roto i te mana'o o taua vahine Samaria ra e riro iā to'na taeraa mai i te hoê tau i muri atu ra. Aita roa oia i mana'o e o te Mesia mau iho o tei paraparau mai ia'na ra. E homa, aita anei outou i farerei i te tabi mau taata o tei faaita mai e, te farii papu nei ratou i te bibilia e te tiaturi nei hoi ratou e e tupu mai te mau tohu atoa i tohu-

ê-hia na e te mau peropheta, i te na ôraa mai e, eita paha taua mau tohuraa ra e tupu i teie nei tau, i te tahi tau ê râ e tupu mai ai.

Te ite nei au i te hoê taata o tei taio i te penê 29 no Isaia ra, e ia oti i te taio-raa-hia, te na ô maira oia ia'u; "E hoa, te tiaturi papu nei au i te mau mea i papaihia i roto i taua parau ra. Ua papu ia'u e e itehia te hoê buka i raro a'e i te repo, terara, eita paha taua buka ra e iteahia i teie nei tau, ia hope faahou â e hoê hanere matahiti e itehia'i." Ua na ô atura vau ia'na; "Te mana'o nei paha oe e, ia hope taua na matahiti e hoê hanere ra, e hau a'e anei to oe ineineraa i to teie nei mahana i te fariiraa i taua buka a Isaia ra o tei parau mai e e itehia i raro a'e i te repo? E aore râ, e tia anei ia ia'u ia faaite atu ia oe e, hoê â huru to oe mana'o i to taua vahine Samaria ra o tei tiaturi â i te tupuraa o te hoê mea tei tupu ê na e o tei vai papu mai hoi i mua i to'na ra aro. Pahono maira taua taata ra ia'u; "e hoa, haamaramarama mai oe ia'u. Te parau ta oe i parau mai nei mai te parabole ia te huru, e aore i tau ia'u te auraa o te parau ta oe i parau mai nei. Na ô atura vau ia'na ra; "Tuaa buka i faaitehia e Isaia ra, ua iteahia ia i raro a'e i te repo i te fenua ra o Amariika i te matahiti 1823, e na te melahi i faaite mai ia Iosepha Semita i te vairaa o taua buka ra." Ua farii anei taua taata ra i taua parau ta'u i parau atu ra? Aita, Te na ô maira oia ia'u; "E faainaina-Atua ta oe i parau maira, a parau mai ai oe e, ua pou mai te hoê melahi i nia i teie nei ao i roto i teie nei mau mahana apî, ua opani-ê hia na te mau ra'i, e ore hoi e iriti-faahou-hia." Teie te vahi maere i roto i te parau a taua taata ra, oia hoi, te tiaturi nei oia i te taeraa mai o taua buka ra i te tau i muri atu nei. I roto râ i to'na ra mana'o, aita a te Atua e ravea ia faaite mai i te vairaa o taua buka ra, no te mea e te parau mai nei oe e ua opanihia te mau ra'i e ore e tia i te

hoê melahi ia pou mai i raro e faaite i te vahi hunaraa o taua buka i parauhia e Isaia ra. Ua na ô atura vau ia'na e, "E hoa, eaha te ravea e roaa mai ai taua buka ra?" Te na ô maira oia ia'n; "Aita ia i taa papu ia'u, i roto râ i to'u mana'o e ite-noa-hia paha ia. Parau atura vau ia'na e, aore roa Isaia i faaite e e ite-noa-hia taua buka ra, te parau mai-ra râ oia e irit hia ia no roto mai i te repo, e tuuhia'tu ai i te hoê taata ia taio oia i taua buka ra, e te faaite atoa nei o Isaia e, te taata o tei roaa mai ia'na taua buka ra, e faaite mai ia oia e, aore oia i ite i te taio parau. Ua faaite atu vau i taua taata ra e, tei reira mau te mau parau ta Iosepha Semita i parau atu a tuhia mai ai taua buka ia'na ra, no te mea, aore mau hoi o Iosepha Semita i ite i te taio i te parau no te mau re'o êê. Te mana'o noa ra râ taua taata ra e e ite-noa-hia taua buka ra i roto i te tahi mau matahiti i muri atu nei.

E faahuru ê mai anei te mau mana'o etaeta mai to taua taata ra te huru i te ite-papu-raa e na te melahi, na Mōroni i faaite mai ia Iosepha Semita, te vairaa o taua buka ra? Teie te pahonaraa, "Aore roa ia." Te faaroo nei tatou atoa e ua tupu-ê-hia na te hoê pae o te mau tohu i tohuhia e to tahito ra, e te maere nei to te ao e, aore te ati Iuda i farii i te tupu-raa o taua mau tohuraa ra e faaaraaraa ia ratou. E mea tia hoi ia matou ia parau atu e, arua'e te mau feia no te anota i muri atu nei e parau mai ai e mea maere, aore outou i farii i te mau mea i tupu ra, oia hoi, i te roaaraa mai o taua buka ra no raro mai i te repo, e te pouraa mai o te mau melahi, e te tahi atu â mau mea maere tei tupu i teie mau mahanapi nei.

No te aha ra e ore ai e tia i to te ao nei ia araara mai e ia farii mai ratou i te mau tohuraa mai tei tohuhia i roto i te bibilia, e mai te faahuru ê ore i te parau a te Atua ra. Ua

papu ia outou atoa e, te vai nei te tau e tuuhia mai ai taua buka i parauhia e Isaia ra i mua i to tatou aro, no reira e homa, no te eaha ra ia e ore ai e tia ia riro teie anotau apî nei ei anotau mau no te tuuraa mai o taua buka ra?

A taio na outou i te Apokalupo pene 14 irava 6.

“Hi’o atura vau i te hoê melahi i te maueraa no ropu i te reva nei: ma te evanelia e tia i te vairaa ra ei pororaa’tu i te feia e parahi i te ao nei ra, i te mau fenua atoa, e te mau opu atoa, e te mau re’o atoa, e te mau nunaa atoa.”

Te faaite mai nei o Ioane e, e tae mai te hoê melahi i te tau i muri mai ia’na ra ma te evanelia e tia i te vairaa. E homa, e farii anei outou i te mau paran ta’u e paran atu nei, a faaite atu ai au e, ua tae ê na taua melahi ra. Te pinai mai nei te re’o e, te feaa nei matou i ta oe i parau mai. Ua na reira’toa te vahine Samaria o tei farerei i te Mesia i te pae apoo pape ra, ua feaa oia i te parau e, o Iesu mau taua taata o tei paraparau mai ia’na ra. Te ui mai nei paha outou e, ua fâ mai taua melahi ra ia vai? E pahono atu ai au ma te popou e, ua fâ mai taua melahi ra i te peropheta ra, ia Iosepha Semita. Te na ô mai nei outou ma te re’o mutamuta, e parau mau anei te reira? O vai ia te ati ia ore outou e farii i taua parau ra, e ere anei ia o outou ana’e? Oia mau. Aita atoa te ati Iuda i farii ia Iesu ei Mesia. Aita râ Oia i faarirohia ei Mesia haavare na roto i to ratou farii-ore-raa ia’na. O vai hoi ia tei ite i te melahi o tei fâ mai ei faaite-raa i te fanauraa o te Mesia? E ere anei ia e toofanu pue tiaï mamoe ana’e tei ite i taua melahi ra? Oia mau. E te tiaturi noa nei â anei outou e ua ite-mata-hia taua melahi ra e taua pue tiaï mamoe ra? Te pahono mai nei outou e, E, te tiaturi noa nei â e, ua ite-mata-hia taua melahi ra, aita râ te melahi ra i fâ mai i teie anotau apî nei. E mai te mea e ua fâ mai te hoê melahi, no te aha ra i ore oia i fâ mai ai i te

hoê orometua i hau i te paari? Teie te pahonoraa. No te aha i ore ai taua melahi ra i itehia e taua pue tiaï mamoe ra, i fâ mai ai i te arii rahi ra ia Heroda? Te na ô maira Paulo i te Korinetia I pene 1 irava 20, 21-27; "E ere anei ua faariro te Atua i te paari o teie nei ao ei maamaa. Aore a'era to te ao i ite i te Atua i to'na iho paari i te ravea paari a te Atua ra. Ua maiti râ te Atua i te mau mea maamaa o te ao nei, ei faahaama atu i te feia paari, e ua maiti hoi te Atua i te mea paruparu o te ao nei, ei faahaama'tu i te feia puai. No reira e homa, ia faatia mai te Atua i te hoê mea apî, eita Oia e maiti te taata paari peneia'e e tupu te mana'o teoteo i roto i taua taata e iho ia te ohipa. Te na ô maira te Atua; "E ere hoi to'u ra mana'o i to outou ra mana'o; e ere hoi to outou ra haerea i to'u ra haerea," Isaia 55:8 Te na ô mai nei outou e, aore ia e nehenehe ia matou ia tiaturi i te parau e, ua tae mai taua melahi ta oe i parau na. E homa, atira noa'tu i te reira, o outou iho ana'e ra tei atihia, e aore ia i taa ia outou te rahiraa o te maitai tei ore i noaa mai ia outou na roto i ta outou faahaparaa i taua melahi ra. Noa'tu i to te ao nei tiaturi-ore-raa i te taeraa mai o te mau melahi i teie tau apî nei, te faaite papu atu nei matou e, ua tae mai na melahi e rave rahi ia Iosepha Semita mai tei faaauhia e te parau tohu i papaihia i roto i te buka mo'a a te Atua ra.

E hi'opoa rii tatou i te parau i tohuhia e Ieremia i te pene 3 irava 14. Te na ô maira oia; E tataihoê ta'u e rave i to te oire hoê, e tataipiti i to te opu hoê, e aratai atu ai Au ia outou i Ziona. I muri a'e i te faataeraa'tu te evanelia i te mau fenua atoa ra tupu ihora taua tohuraa a Ieremia ra, no te mea, ua arataihia'tu hoê i to te oire hoê, e piti hoi i to te tahi oire ê, haere roa'tura ratou i Ziona i Amarika. Eaha te tumu i haere atu ai ratou i Ziona i Amarika? Pahonoraa. Te na ô maira o Malaki i te pene 4 irava 5, 6; "Inaha, e to-

no na vau i te peropheta ra ia Eliaha ia outou na, a tae atu ai i taua mahana rahi mata'u o Iehova ra: Ia faafariu oia i te aau o te mau metua e te tamarii, e te aau o te tamarii e to ratou mau metua, o te haere mai hoi au, e o te tairi i te fenua nei i te ino."

Eita paha to te ao e farii i te parau i parauhia'tu e, ua tae mai o Eliaha. Atira'noa'tu te reira, ua tae mai oia i roto i te hiero Keletani i te 3 no Eperela i te matahiti 1836. Te ui mai nei paha outou e, eaha to'na tere mai i roto i taua hiero ra? Pahonaraa. Ua fa'mai oia ei faaiteraa mai i te peropheta ra ia Iosepha Semita e, e mea tia ia baptizohia te feia ora nei no te mau feia i pohe ra, e o tei ore i farii i te evanelia a vai ai ratou i roto i te tino tahuti noa nei i nia iho i teie nei aq. No reira e homa e, te hoê ia tumu ta Ieremia i parau atu e, e ravehia tataihoê i to te oire hoê, e tataipti i to te opu hoê, e arataihia'tu ai e te Atua i Ziona ra.

Te mana'o nei anei outou e e mea tia ia patu i te hiero hou a'e e tae-piti mai ai te Mesia ra? Na Malaki i faaite mai e patuhia te hiero hou a'e e tae-piti-mu ai te Mesia ra, oia hoi, te na ô maira o Malaki i te pene 3 irava 1, "Inaha, e tono vau i tauvea, e na'na e haamaitai i te e'a i mua ia'u ra: e te Fatu ta outou e imi na, o te tae vave mai ia i to'na ra hiero."

Te mana'o nei au e, e mea fifi roa na te Atua iho ia tomo mai i roto i te hoê hiero, o tei hamani-ore-hia, e ere anei ia? E tae mai râ Oia i to'na ra hiero, o tei hamanibia e te Ekalesia a Iesu Mesia i te Feia Mo'a i te Mau Mahana Hopea nei. Ua oti ê na na hiero e ono i te patuhia e te vai atu â o tei opuahia e matou i te hamani. Te hiero hopea roa ra o te hamanibia e matou, o te hiero rahi hanahana faito ore ia, e to'na tiaraa tei Inedepenedeni ia.

E hi'opoa rii tatou i te tohu a Daniela i te pene 2 irava 44. Te faaite mai nei o Daniela, e e tupu mai na basileia e maha, hoê noa iho râ basileia i te anotau hoê. Na te basileia

matamua e faatere i te ao taatoa nei, e ia parari atu, i reira ia e tupu mai ai te piti o te basileia ia faatere i te ao taatoa nei e mai te reira te huru, e tae noa'tu ai i te maha o te basileia. Ia parari râ te maha o te basileia e reira ia e tupu mai ai te mau basileia o tei faaauhia i te manimani avae e ariihia hoi taua mau basileia ra e te mau arii. "I te anotaui o taua mau arii ra, e faatupu ai te Atua o te ra'i ra i te hoê basileia. o te ore roa ia e mou, e ore roa hoi e riro ia vetahi ê e hope roa hoi taua mau basileia ra i te parari e te pau, e vai tera e a mure noa'tu." Daniela 2:44.

Te parau faahiahia ra, teie ia, ua faatihia taua basileia i parauhia ra e Daniela. E i te faatia-raa-hia te reira basileia ra i roto i te matahiti 1830, te vai mau ra hoi te mau arii i parauhia i roto i te pene 2 irava 44. E taua basileia ra e te Ekalesia a Iesu Mesia i te Feia Mo'a i te Mau Mahana Hopea Nei hoê ana'e a huru basileia ia. E iti roa te mau fenua tei ore i taehia e te mau oromteua na teie nei Ekalesia a Iesu Mesia nei. Aita anei outou e haamana'o i te parau a te Mesia a parau atu ai Oia e, "E e parau-haere-hia te evangelia o te basileia nei e ati noa'e teie nei ao, ia ite te mau fenua atoa; o te hopea ihora ia i reira ra." Mataio 24:14. Aore anei ia e nehenehe ia ite e, te tupu noa nei â te mau tohu i rotopu mau ia outou, area râ, ua riro mau teie nei anotaui, mai te anotaui o te ati Iuda ra, o tei hi'o noa i te hoê anotaui e tae matamua mai ai te Mesia, e inaha, ua tae ê mai na Oia, e te hi'o nei outou i mua i te vahi atea roa ia ite outou i te hoê poe faufaa rahi, e inaha, teie taua poe rahi ra i te vahi fatata, oia ia, i mua mau i to outou mau aro. Ua tia hoi te parau a te Mesia a na ô atu ai Oia; "A imi outou i roto i te parau mo'a, no te mea te mana'o na outou e noaa te ora mure ore i reira." Eaha râ te faufaa ia imi i te parau mo'a ra mai te mea aore outou e farii i te mau parau i roto

ra? Te na ô mai nei paha outou e, te farii papu nei matou i te mau parau i roto i te parau mo'a ra. E homa, mai te mea e, te farii papu nei outou i te mau parau mo'a ra, no te aha ra ia, e ore ai outou e farii mai i te mau peropheta maore râ te mau peropheta i pohe ana'e ra? Te ora mau ra te mau peropheta i te anotau tahito ra, e mai te mea e peropheta o Isaia, e o Ieremia, e mea tia hoi ia ia matou ia parau atu e, te ora mau nei te mau peropheta i teie nei anotau, e o Iosepha Semita te hoê i rotopu ia ratou ra, e o Biritamu Ione te tahi atoa, e tae roa mai ia Hebera Garanata.

Te mana'o nei anei outou e, ua fariihia taua mau peropheta i te anotau tahito ra e te ao taatoa ma te auraro maite ia ratou ra? Mai te mea e te reira to outou mana'o ra, e mea tia ia ia outou ia taio i ta outou mau bibilia, e i reira outou e ite ai e, aore roa taua mau peropheta i te anotau tahito ra i farii maitaihia. Ua tuuhia o Ieremia i roto i te hoê apoo, e ua tapupu-hu'ahu'a-roa-hia o Isaia, i rapae au ia Ierusalemia e ua tuuhia o Daniela i roto i te aua liona, e ua faatasaurohia te Mesia, e ua taparahi-haapohe-roa-hia te mau aposetolo tahito ra, maori ra o Ioane ana'e ra tei ore i taparahi-haapohe-hia. No reira te mana'o nei anei outou e, e hau a'e te huru fariiraa a te taata i te mau peropheta no teie nei anotau i te huru o te fariiraa a te taata i te anotau tahito ra. Aore roa ia. Aita anei outou i faaroo i te hamani-ino-raa-hia o Iosepha Semita no to'na faaiteraa e, ua ite mata oia i te mau melahi?

E homa, te anihia'tu nei ia outou atoa na e imi maite faahou â outou i te mau parau mo'a, e imi râ outou mai te aau haehaa e te pure mau i te Atua o tei vai teitei ra, e itehia'i e outou e o te evanelia ora mau teie nei evanelia ta matou e faatae atu nei i mua ia outou atoa na.

Eraneta a Rositera.

Aore Nehenehe i te Mau Tamarîi rii ia Hara.

“Te tamarîi rii * e ore ratou e hara, aita te mana i tuu atu ia Satini ia fuaheina i te tamarîi rii e tae noa’tu i to ratou riroraa ei feia mana’o i mua ia’u nei.” B. F. 29: 46-48; 20:71; B. F. S. 28:13.

“Ua mo’a râ te tamarîi rii, no te mea ua haamo’ahia na roto i te taraehara a Iesu Mesia.” B. F. 74:1-7; B. F. S. 74:3; Mosia 15:25; Moroni 8:8,22; Mataio 18:10.

“Ua parau atura râ Iesu, e vaiho noa mai i te tamarîi rii ia haere noa mai na ia’u nei, eiaha e faaorahia atu, mai ia ratou hoi to te basileia ra o te ao.” Mataio 19:14; Mareko 10:14.

“E teie â hoi, mai te mea e tamarîi ta te hoê pae metua i Ziona, e i te tahi atu â i ta’ua ra mau mataenah o te haamauhia ia, o tei ore i haapii atu ia ratou i te parau no te tarahapa; te faaroo i te Mesia te Tamaiti a te Atua ora ra; e te parau no te bapetizoraa e te horoaraa no te Varua Maitai na roto i te tuuraa rima ia taeahia te vau o te matahiti ia ratou, i nia ia te hara i te upoo no te mau metua.” B. F. 68: 25; B. F. S. 63:4.

Mau Parau Apî

Ua tupu te hoê ma’i apî huru ê roa i te fenua ra o Amerika. E te au nei te huru o taua ma’i apî ra i te ma’i Epanoria maori râ e, i te poheraa o te taata i taua ma’i ra e tupu atoa te vare taoto ia’na. Ua taoto noa te hoê mau taata i roohia i taua ma’i ra e ia hope i na mahana e piti ahuru, i reira ratou i ara mai ai.

E faatiahia te hoê haapiiraa faatere pahi reva i te fenua

ra o Utaha i Amarika. E te mau taata o tei hinaaro ia roaa mai i te ite i te faatere i te pahi reva e haapiihia ia ratou i roto i taua haapiiraa ra. E ere te reira ana'e ra, teie atoa te vahi e au, oia hoi, te mau taata o tei hinaaro ia mau atu i roto i te reva nei, e faatiahia ia ia tere atu na nia i te hoê o taua mau pahi reva ra. E homa, e mea au hoi te reira. Ahiri paha e faatiahia te hoê haapiiraa faatere pahi reva i Tahiti nei, anê hoi tatou e, i te oioi no te tere na te tahi fenua e na te tahi fenua moana nei. E ore te taata e garuru i tua i te tereraa na nia i taua mau pahi reva ra.

Te Hopea o te Taata Inu Ava. I te 8 no Tiunu nei ua taero te hoê taata Amarika i te ava, e i to'na ho'iraa'tu i nia i to'na ra pahi tei tapae'hia i te uahu i Papeete nei, tae atura oia i nia iho i te e'a o tei aratai mai te uahu atu i nia i te pahi, topa ihora oia i raro i roto i te miti. Te vahi ta'na i topa, i ropu ia i te pahi e te uahu, e moe roa'tura to'na tino. Ia hope râ e hoê afa hora, ite ihora to'na tino pohe i raro roa i roto i te miti. Na Tara a Tugarua i hopu i taua tino pohe ra e ua roaa mai hoi ia ia'na.

Ua parauhia e, ua roohia e hoê hanere tautani taata i te hoê ma'i pee ino roa, i te fenua ra o Rusia, e te tupu nei ia i te rahi i reira.

TOAE A MAIRE, Faaau Parau, Rue Dumont d'Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Dumont d'Urville,
Papeete, Tahiti.